



SIARAN MEDIA

SAMBUTAN HARI KEBANGSAAN 2021

PUTRAJAYA, 29 OGOS 2021 - Sambutan Hari Kebangsaan 2021 akan diadakan di Dataran Pahlawan Negara pada 31 Ogos 2021 (Selasa), jam 8.00 pagi. Selaras dengan saranan Majlis Keselamatan Negara (MKN) dan Kementerian Kesihatan Malaysia (KKM), Hari Kebangsaan pada tahun ini diadakan berkonsep sambutan secara terbuka (outdoor), terkawal dan berskala kecil serta penglibatan fizikal yang terhad tanpa melibatkan kehadiran orang awam di lokasi.

Oleh itu, seluruh rakyat Malaysia dapat sama-sama menyaksikan siaran langsung sambutan ini menerusi semua stesen penyiar tempatan pada 31 Ogos 2021 mulai pukul 8.00 hingga 8.50 pagi dan di saluran TV1 mulai pukul 7.30 hingga 10.30 pagi. Selain itu, sambutan ini turut boleh ditonton melalui Facebook Live Kementerian Komunikasi dan Multimedia, Merdeka 360; dan Jabatan Penerangan Malaysia.

Siaran langsung ini bakal memaparkan penggunaan elemen teknologi terkini berkonsepkan *mix reality* iaitu gabungan penerbitan secara fizikal, teknologi AR (Augmented Reality) dan juga XR (Extended Reality) berbentuk interaktif dan berteknologi tinggi.

Sambutan juga disertai secara maya melalui *digital audience* pelbagai pihak termasuk wakil-wakil kedutaan Malaysia di ASEAN, wakil-wakil sektor ekonomi, telekomunikasi, kesihatan dan lain-lain termasuk pemimpin masyarakat, pertubuhan bukan kerajaan dan pengamal media.

Sambutan yang bertemakan '**Malaysia Prihatin**' ini membawa pengertian bahawa seluruh rakyat Malaysia turut bersama-sama dengan Kerajaan memerangi pandemik COVID-19 sama ada petugas barisan hadapan (frontliners), penjawat awam, sektor swasta, sukarelawan, pertubuhan bukan kerajaan mahupun orang perseorangan.

Bagi tujuan *trending* (sohor kini) di media sosial, orang ramai boleh menggunakan tanda pagar seperti yang berikut:

- i. #HKHM2021
- ii. #MalaysiaPrihatin
- iii. #MenangBersama
- iv. #DemiNegara
- v. #LindungDiriLindungSemua

Berikut adalah atur cara sambutan Hari Kebangsaan 2021 pada 31 Ogos 2021.

ATUR CARA SAMBUTAN HARI KEBANGSAAN TAHUN 2021

- 7.15 pagi : Ketibaan dif-dif jemputan
- 7.45 pagi : Ketibaan YB Tan Sri Datuk Seri Panglima TPr Annuar Haji Musa, Menteri Komunikasi dan Multimedia dan isteri
- 7.50 pagi : Ketibaan YB Menteri-Menteri Kanan dan Jemaah Menteri
- 8.00 pagi : Ketibaan YAB Dato' Sri Ismail Sabri bin Yaakob, Perdana Menteri dan isteri
- : Nyanyian Lagu Negaraku
- : Bacaan Ikrar Rukun Negara (*Faces of Malaysia*) terdiri daripada para guru dan petugas barisan hadapan
- : Pengisian Persembahan:
- i. Persembahan *Drumline* Angkatan Tentera Malaysia
 - ii. Persembahan Kawad Senyap Tentera Laut Diraja Malaysia
 - iii. Persembahan Pancaragam Gabungan Badan Beruniform
 - iv. Pertunjukan Udara daripada Tentera Udara Diraja Malaysia
- 8.50 pagi : YAB Perdana Menteri dan isteri meninggalkan majlis
- : YB Menteri-Menteri Kanan dan Jemaah Menteri meninggalkan majlis
- : YB Menteri Komunikasi dan Multimedia dan isteri meninggalkan majlis
- : Majlis bersurai

Sebanyak empat persembahan akan diadakan di Dataran Pahlawan Negara pada 31

Ogos 2021 ini iaitu tiga persembahan di lapangan dan satu pertunjukan udara.

Persembahan di lapangan:

- a. Drumline Angkatan Tentera Malaysia (ATM) diketuai oleh Mejar Staf Sarjan Madzain bin Medol;
- b. Kawad Senyap oleh Tentera Laut Diraja Malaysia (TLDM) diketuai oleh Laskar Kanan P.A.P Khairul Hisham Hirwan bin Salleh;
- c. Pancaragam Gabungan Badan Beruniform diketuai Mejar Mohd Rizal bin Hj Mohd Nor. Persembahan ini terdiri daripada gabungan 8 agensi badan beruniform iaitu: ATM (Tentera Darat Malaysia, TLDM dan TUDM), PDRM, APMM, APM, JBPM dan Rela; dan
- d. Pertunjukan Udara oleh Tentera Udara Diraja Malaysia (TUDM)

Pelaksanaan sambutan Hari Kebangsaan 2021 pada tahun ini adalah mematuhi dan di bawah pemantauan yang ketat bagi semua prosedur operasi standard (SOP) melibatkan penjarakan fizikal, pergerakan, pemakaian pelitup muka dan sanitasi di lokasi. Gelembung khusus (safety bubble) diwujudkan bagi memastikan tiada percampuran berlaku yang membuka ruang kepada risiko yang tidak diingini. Semua petugas dan peserta persembahan diwajibkan lengkap dua dos vaksin dan menjalani ujian calitan (swab test).

Pada tahun ini juga, Kementerian Komunikasi dan Multimedia Malaysia turut menjalin kerjasama dengan Kementerian Luar Negeri bagi merealisasikan penyertaan rakyat Malaysia di luar negara. Selain sambutan di tanah air, Kedutaan Malaysia di luar negara juga meraikannya melalui pelbagai cara dan aktiviti khusus untuk warga Malaysia di luar negara. Klip video nyanyian lagu 'Setia' dari diaspora luar negara sempena Bulan Kebangsaan ini akan disiarkan di stesen televisyen.

Seluruh rakyat Malaysia juga diseru untuk terus mengibarkan Jalur Gemilang sehingga Hari Malaysia pada 16 September 2021 sebagai menyemarakkan semangat patriotisme.

**JAWATANKUASA MEDIA DAN PUBLISITI (JKMP)
SAMBUTAN HARI KEBANGSAAN DAN HARI MALAYSIA (HKHM) 2021
29 OGOS 2021**

